

Pol Uqa Jaqec Je Oso

Kolosi Tamanec Jaqiaden

Aqunec Je

Kolosi eu taun oso Esia hatuna nijen. Eu Efesas taun cemenug nijen. Pol uqadodoc Kraisi tamanec Kolosi ono qee sanan mel. Euqa Pol uqa Efesas bilen saenna uqa dana oso, ijan Epafra, me je maadecnu suldocob Kolosi ono nuen. (Eu 1.7-8, Aposel 19.10 feiga.)

Pol uqa jaqec je i jaqen saenna uqa Rom ono uqana jona gihadoc bilen. (Eu Aposel 28.16-31 feiga.) Uqa Rom ono bibilei Kolosi tamanecnu je eu don. Uqa dana leih age tamanec uhuli iwaladegina ec don. Dana eu age tamanec sab leih cain jowain ec maadegina, age deel leih eu gun bahic ec maadegina. Age ceteteh leih cain hewowain, cain ji fowain, cain quduwain ec madegina. Age enselnu cuha fegina. Age Kraisi uqa ohis bahic qee ec madegina. Age dana uqa jahunec je dona eu uqa dana docca ec madegina. Age dana agena cisdoc todogina. Uhulec iwaladec eu Filipai tamanec agena wawaga meleec me qee odona eunu Pol uqa tamanecna wawaga meleec tutuc mudecnu jaqec je i jaqiaden.

Pol uqa uhulec iwaladec eu mele qee ec madena. Eetanu eu mele qee? Kraisi uqa Anut. Ege Kraisi foqona eu odi ege Anut foqonawe (1.15). Kraisi uqa ceteteh cunug Anut ifanen eu agena matu bilia (1.15). Uqa ceteteh cunug qee calec ninijen uqa aquniadi bilen (1.17). Kraisi uqa uqana tamanecnaca, uqa ceteteh cunugca agena ilo bilina (1.18). Eu Kraisi himec uqana tamanec ceseli fajadi besaden (1.13). Jic oso cesulgecnu qee nijel. Kraisi uqa cal mecnadec ceseli cajec matu (1.18). Anut uqana cebac bilecca, uqana kobol cunugca eu Kraisi dewegna am bec bilina (1.19, 2.9). Kraisi uqa ceteteh cunug saona mahanaca bilegina eu Anutca tanawadena (1.20). Eunu dana cajaca age Kraisca gabandoc bilegina euna himec Anut uqa cahahaadecnu ihoc (1.21-22). Odime i Pol uqa dac 2 leceb 4na Kraisi uqana gug inu Kristen dana cajaca age adi biluqagannu maadena.

Pol uqa jaqec je i jaqime i dana lecis alen. Odoboc dana lecis ale ehi li Kolosi tamanec aden. Dana i ale oso eu Tikikas. Oso eu Onisimas. Pol uqa Onisimasnu je mati jaqime i jaqec je i Failimon suldon.

Je Dunuhnu Dado Mec

1. Aqunec je (1.1-14)
 - A. Feele adec je (1.1-2)
 - B. Hetaga ec je (1.3-8)

- C. Inondoc je (1.9-14)
 - 2. Kraiŋ uqa ceteteh cunug aŋena ilo bilina (1.15-23)
 - 3. Pol uqa Kraiŋna tamanecnu cabi ona (1.24-2.7)
 - A. Uqa Kolosi tamanec cesuladen (1.24-29)
 - B. Uqa Kolosi tamanec aŋena wawaga meleec eunu cisdona (2.1-7)
 - 4. Ege Kraiŋsca gabandoc cebac biluquna eunu ege dana aŋena uhulec je toodocnu qee nijel (2.8-15)
 - A. Age uhulec iwaladec dananu mecii cuhadoigale (2.8-15)
 - B. Uhulec iwaladec dana cain toodowain (2.16-19)
 - C. Pol uqa uhulec je uqana gug eu fena (2.20-23)
 - 5. Tutuc cobocnu loo je (3.1-4.6)
 - A. Cebac bilec haun hilahca (3.1-17)
 - B. Kristen talnu loo je (3.18-4.1)
 - C. Ege gagadicca inondudu jic tutuc coboqale (4.2-6)
 - 6. Feele adec cit qoc je (4.7-18)
-

1 ¹Ija Pol, ija Kraiŋ Jisna aposel. Ija Anut uqana cisdocna aposel calem. Ija ege wawige meleec cotige Timotica, ²ele Anutna dana cajaca qagoc age Kolosi ono bilegina eu ele wawile meleec cotileil age Kraiŋsca gabanadec bilegina eu jaqiadowona. Memige Anut uqana eelgec uum igec malol bilecca ageca biliale.

Kolosi tamanec age Jisna wawaga mele bahic meleena

³Ele aŋenu Anut inondowona saenna ele Anut uqa eŋena Tibud Jisna Kraiŋ Memeg gaid helaga downanu. ⁴Ge, ele age Kraiŋ Jisna wawaga meleena ec doh. Odocob age Anutna dana cajaca qagoc cunugnu nalunuga megina ec ha doh. ⁵Mele je eu me je ageca hahawan hocob age Kraiŋ Jisna wawaga meleceeb age ceteh me Anut uqa aŋenu saona gun hewi cofdona eunu dah mein. Ceteh me eu age ocnu sumudi bilegina. Eunu aŋena wawaga melecca aŋena nalunuga mecca alena gug eu ceteh me age ocnu sumudi bilegina. ⁶Me je eu ageca hon. Dana cajaca ageha mahamaha cunug me je maadec cabi ogina. Odocob dana cajaca mati bahic age me je dah mimeig wawaga meleen. Me je eu dana cajaca mati bahic age gemona li hunawi ihoc lena. Kolosi ageha hahawannadec Anutna eelgec uum igec eu mele bahic ec dah mimeig me je eu age gemona li hunawi ihoc lenwe. ⁷Age Anutna uum igec eu mele bahic eunu Epafras wele iwaladeceb oin, uqa ele cabi hijile bahic, uqa Kraiŋsca cabi dana me, uqa ele cesullimeil Kraiŋsca cabi me cofdona. ⁸Odocob uqa aŋena nalunuga mec kobol eu Kis Gun uqa aden ec malen.

⁹Gug inu ele deel hahawannadec aŋena kobol menu dah moh eu gaid li Anut aŋenu inondocnu qee culoloh. Ele Anut aŋenu odi inondowona, Anut uqa uqana

cisdoc age wawagana meceb du cuhadoqagannuca, Anut uqana Kis uqaha Anutna cisdoc silec fogo adecca eu cunug adecnuca ec inondowona. ¹⁰Odocob age Tibud gale dona eu odi cobocnu ihoc. Odocob ceteu uqa waug me nijigian eu gaid odoqagan. Agena cebac bilec eu cabi me hanoqagan. Odocob age Anutnu doc silecca eu ben dugian. ¹¹Anut uqana gagadic odoc fulacdoccanadec gagadic cunug eu odadeceb age gagadic meigale. Eunu age ceteu cunugna gagadicca tawimeig culumen gahidoqagan. Odocob age ceelecca ¹²Memige Anut hegaga doqagan, uqa cesuladeceb Anutna mugumuga mec Anutna dana cajaca qagoc eu age cul fulacdocca euna bilegina eu oqagan age oqagannu eu ihoc odon. ¹³Uqa tuna gagadic odocnadec besigi ehigimeu uqa Melah uqa nalug mena eu uqana culna migen. ¹⁴Ege Anut Melahca gabandu biluqunanu Anut Melah uqa ege fajigi besigen, odimeu egena silail cagasigen.

Krais dumanca uqana cabica

¹⁵Ege Anut fecwe qee euqa Anut Melah ege fecnu ihoc qa uqa Anut. Uqa ceteteu cunug Anut ifanen eu agenamatu bilia. ¹⁶Ge, Anut uqa ceteteu cunug Melah ebenna ifanen. Uqa ceteu saona nijiaca, ceteu mahana nijiaca, ceteu foqonaca, ceteu qee foqonaca, kisna gagadic odocca, tibud eundecca, king bilecca, gabman cofadecca, eu cunug Melah ebenna ifanen. Anut uqa ceteteu cunug Melahnuha ifanen. ¹⁷Anut Melah uqa ceteteu cunug qee calec ninijen uqa aquiniadi bilen. Odimeu uqa ceteteu cunug heweceb bilegina. Uqa ceteteu cunug agenagug bahic, age uqanu agenacudun bahic oin. ¹⁸Uqa tamanecna ilo, tamanec eu uqa deweg. Uqa gug qoc, uqa cal mecnadec ceseli cajec matu. Eunu Anut uqa ceteteu cunug agenaquiniadec biligiannu muden. ¹⁹Eetanu? Anut uqa uqana cebac bilecca, uqana kobol cunugca eu Melah am bigiannu galedon. Eunu uqa mitocob bilen. ²⁰Odocob Anut uqa Melahna uqa ceteteu cunug saona mahanaca bilegina eu Anut uqadodocca tanawoqagannu cisdon. Odocob uqa Krais golac na babalecna baseccon euna malol mudeceb ceteteu cunug saona mahanaca bilegina eu uqaca tanawaden.

²¹Ageha age saen osona Anut cemenug qee bilelein. Age qisol mimi age cisdoc me qee cisdoloig eunu age uqana cad onoca bahic bilein. ²²Euqa qila uqa Melah deweg na babalecna cal men euna Anut uqa tanawadeceb uqaca osoben wawaga osol men. Melah uqa age ehadeceb Anutca loqagannu, odocob age gunca, tutuc odocca, cataniecca uqa amegna biluqagannu uqa eu odi odon. ²³Euqa age wawaga meleec gagadic hewimeig duuec taweiga. Odocob ceteu oso age diadeiaunnu age ceteu me ocnu sumudi bilegina eunu me je wele doin eu dahiniga cain celeiaun. Ija Pol, ija me je uqana cabi dana calem. Odocob me je eu, age dana cajaca cunug mahamaha bilegina eu qasali maadein.

Pol uqa Kolosi tamanec cesuladen

²⁴Qila ija agenu culumen gahidugina eunu ceeligina. Ija dewenina culumen gahidugina euna Kraisna culumen gahidoc leih nijia eu ihoc

ligiannu odigina. Ija tamanec cesuldocnu odigina, tamanec eu Krai deweg. ²⁵Odocob Anut uqa ija tamanecna cabi dana miten. Uqa ija cesuladigennu cabi i iten. Cabi i ija Anutna je cunug dana cajaca maadecemin doqagannu iten. ²⁶Anutna je eu wele saen cunugna jahuni bilen, eu dana cajaca cunug qee doloin. Euqa qila Anut uqa je jahunec eu uqana dana cajaca qagoc eu ageca camasac meceb doin. ²⁷Anutna cisdoc eu odi, uqa uqana je jahunec eu odocob uqana dana cajaca doqagan. Je jahunec eu cehewanca, eu gagadic odoc fuladocca eu dana cajaca mahamaha cunug bilegina agenu bilia. O Kolosi, je jahunec uqana gug eu odi, Krai uqa age wawagana bilina. Odocob age uqana gagadic odoc fuladocca adigiannu sumudi bilegina. ²⁸Eunu ege Krai me je dana cajaca cunug qasali maadoqona. Ege cisdoc silecca cunug dana cajaca ulaulaadi iwaladoqona, ege dana cunug osolosol ehadocomun age wawaga meleec dana bahic Krai gabanadec bilegina eu odi bahic Anut cemenug caloqagannu. ²⁹Eunu ija cabi i odocnu gisi cagugina. Gagadic odoc Krai itina eu ija wawina cabi ona euna cabi ugina.

Ege wawige meleceeb duueceb uhulec je bitidocnu

2 ¹Ija agenuca dana cajaca Leodisia bileginanuca, dana cajaca cunug ija olani qee feleinnuca cabi gagadic om eu adi cultecebil maadiga. ²Age hulunuga cehecnuca, age gabandumeig dana cajaca ititom cunug wawaga osolna nalunuga moqagannuca ija cabi geh om. Eunu age cisdoc me umeig me je eu mele bahic ec fogo adigian. Eu odina age Anutna je jahunec gug eu Krai ec doqagan. ³Anutna cisdoc silecca docca me bahic cunug eu Krai jahuni bilina.

⁴Age Kolosi, dana oso uhulec jena qauadeiaunnu ija eunu odi maadigina. Euqa uhulec je eu docnu me bahicfi cain dah mowain. ⁵Ge, ija dewenina ageca qee biluquna qa ija gaid dolonina ageca biluquna. Odocob age cabi eb li tutuc u bibileig Krai wawaga meleec gagadic mena echa feciadigina eunu ceeligina.

Ege Krai fagdumeb cebac bilec bahic ocnu

⁶Age Krai Jisas Tibud wele oin eunu age uqaca gabandoc coboigale. ⁷Agena bebeig uqa dunuh bahic ceheiga, agena cebac bilec uqa lalan ceheiga. Odocob agena wawaga meleecna odi age iwaladeinwe gagadic bahic meiga. Odocob age gaid Anut hegaga doigale.

⁸Gadgad dana oso uqa danana je docca uhulec je gaucca euna qauadeceb age uqana je toodu odowainnu age mecii cuhadoigale. Je doc eu dana wele bahic bilein eu agena, eu mahanadec tibud age dana eu iwaladein, odocob je doc eu ege qila biluquna egeca hoin. Euqa je doc eu Krai uqana je qee bahic.

⁹Ge, Anutna cebac bilec cunug eu Krai dewegna am bec bilina. ¹⁰Odocob age uqaca gabandocna agena cebac bilec ha am bec bahic men. Krai uqana

gagadic odoc eu tibud meca me qeeca cunug agena gagadic odoc wooladena. Kraiſ uqa cunug agena ilo bilina. ¹¹Age uqaca gabandocna age dewenega cagu qoin, eu dana dewenega cagu qogina eundec qee qa Kraiſ uqadodoc uqana dewenega cagu qoc euna dewenega cagu aqen. Kraiſ uqa dewenega cagu aqecb age dewenega hilah eu culein. ¹²Odocob age wa joc oin saen euna age Kraiſca heel cisadein. Odocob age wa jocna ha age Kraiſca ceseli cajein, eu Anut uqa Kraiſ tulidocob cal mecnadec ceseli cajein eu uqana gagadic odiodiecnu wawaga meleecna age ceseli cajein. ¹³Wele age agena silail mecca, age Juda dana qee eundec dewenega cagu qee qocca eunu cal mec biloloig. Euqa qila Anut uqa age Kraiſca gabanadeceb cebac bilec euna bilegina. Anut uqa egena silail cunug cagasigen. ¹⁴Loo je uqana gagadic odoc eu cilehgen. Loo je eu ege gelgimei egena silail cahuldocca cunug eu cain odowain ec magen. Odocob Anut uqa loo je uqana magecca, uqana gagadic odocca eu Kraiſ uqana na babalecna tuitu qumei cunug eu qee mudi hedon. ¹⁵Odocob Kraiſ uqa na babalecna tibud me qee agena iloiloca tibud me qee gagadic odocca agena gagadic odoc cagasi qee muden. Odimeſi uqa age wooladimeſi iwalaadi ehadeceb age dana cunug amagana ceteſ gauc cinigwe toodu coboin.

¹⁶Eunu dana oso culdecebil age sab waca qagu jeginanuca, deel gunnuca, jagel haunnuca, Juda agena cuha deelnuca loo je oso cain mowain. ¹⁷Ceteſ i cunug eu ceteſ hibna caligian hahun qoc qa ceteſ bahic eu Kraiſ. ¹⁸Dana oso uqa ceteſ oso codocna fenaca, uqa enſelnu cuha fenaca, uqa uqadodoc ijan mahana uhuli mudinaca age dana eundec oso culdecebil age deweneganu je cain um aqimeſi agena ameg me oiaun. Dana eundec uqa deweg hilahna cisdoc toodona, odocob uqanel cisdoc eu tutuc bahic ec cisdon. ¹⁹Dana eundec uqa Kraiſ, ege tamanec egena ilo, hewec culen. Kraiſ uqa ilowe deweg cunug cofdudu sab waca utina. Odocob deweg cunug uqana gomahin hilimanagana fagdu libec bilia eu ben mena, odiwe Anut uqa eu ben mecnu gale dona.

²⁰Age Kraiſca wele cal mein, odocob uqa mahanadec tibud me qee agena gagadic odocnadec besiaden. Eunu age eetanu qila maha inadec dana cinigwe cobogina? Age eetanu mahanadec loo je toodogina? ²¹Loo je eu odi, ceteſ eu cain hewowain, odocob ceteſ eu cain ji fowain, odocob ceteſ eu cain quduwain. ²²Loo je eu ceteſ cunug ege euna cabi oqona eu me qee menanu madena. Eu dana age dih loo je eu ifanimeig ege iwalgegina. ²³Eu mele, loo je agena gug eu cisdoc silecca fec cinigwe. Loo je eu enſel cuha fecnu gagadic madena, odocob uhuli jogoi cobocnu madena, odocob dewenega qocnu madena eunu cisdoc silecca fec cinigwe. Euqa uqa ege ceſulgeceb dewenige hilahna kobol cilehdocnu ihoc qee.

Ege Kraiſca osoben cal mecnadec ceseli cajom

3 ¹Age Kraiſca osoben cal mecnadec ceseli cajein. Eunu age ceteſ sao ohisna isec nijia eu ocnu ebebaseigale. Ono Kraiſ kingna cabalna

bilina, uqa Anut eben meulana isec bilina. ²Mele, cete mahana nijia eu ocnu cain cisdowain. Cete sao ohisna nijia eu ocnu cisdoigale. ³Ge, age cal mein, odocob agena cebac bilec eu Kraisca gami Anut dunuhna jahunec nijia. ⁴Krais uqa egena cebac bilec gug, uqa isi camasac migian. Saen euna age uqa gami kobolkobolca camas moqagan.

Cebac bilec haun hilahca

⁵Eunu age kobol me qee mahanadec wawagana cabi ogina eu qocobil cal meia. Wal kobolca, kobol gegehin odocca, belicanaga me qeeca, gale adec me qeeca, odocob ceteteh mati bahic ocnu amaga qona. Ge, ceteteh mati bahic ocnu kobol eu odi kadan tibudnu cuha fec kobol cinigwe. ⁶Dana age kobol i odoginanu Anut uqa dana age uqa feedogina eu ameg me qee wadacadigian. ⁷Wele age kobol i toodu odoloig saenna ageha kobol ina coboloig.

⁸Euqa qila age kobol i edec cunug u qeleiga. Age gemanaga becca, olohonoga becca, sagagadecca u qeleiga. Age conogana um qoc jeca socaec jeca cain madowain. ⁹⁻¹⁰Age wawaga hilah eu uqana kobolca wele culein, odocob age wawaga haun taqein. Anut uqa wawaga haun eu ifanen, odimeiu qqa gaid waticdodoi Anut uqadodoc wicanwe ibuldona. Uqa age Anutnu du cuhadocnu odi odona. Eunu age oso uhuldocabdocob cain owain. ¹¹Gug inu dana age qila sihul filfil qee bilegina. Age Juda danaca, Juda dana qee eundecca, dana dewenega cagu qocca, dana dewenega cagu qee qocca, dana je filfil madecca, dana jobon qee bilecca, dana bega mehca, dana besiadecca, eu cunug age Krais himec. Dana cajaca cunug age wawaga haun taqein agenu ceteteh cunug eu Krais himec, Krais uqa dana cajaca eundec dunuh bilina.

¹²Age Anutna dana cajaca qagoc, uqa nalunuga mimei age uqana bilituqagannu nesili cedaden. Eunu age wawaga qocca, me odadecca, jogoi cobocca, gemanaga jocosagca euca, lalafanagaca, eu age taqeingale. ¹³Age cotoga oso uqa me qee odadecebfii age ameg me qee cain wadacdowain. Age cotoga uqa oso kobol me qee odudennu jecafi uqa cotoga eu uqana me qee odoc eu dahig celeiale. Tibud uqa agena silailnu dahig celen eunu age agena silailnuha dahiniga celecebecebeigale. ¹⁴Ceteteh i cunug oso eu wooladec bilia, eu nalunuga mec. Age nalunuga mec taqeingale, eu ceteteh cunug jeladeceb osol me bahic bilegina. ¹⁵Krais malol bilec igina eu culdecebil age wawaga me cofdoiale. Ge, Anut uqa age malol bilec i umeig age deweg osol bilecnu utaaden. Odocob age Anut gaid hegaga doigale. ¹⁶Kraisna je eu cehewanca bahic, eunu age culdecebil wawagana gagadic biliale. Age cisdoc silecca iwaldocabdocobii bileig, dahiniga hewecebhewecebeigale. Age samnaca, kalamnaca, due Kis Gun iwaladena eunaca Anut hegaga dudu bileig wawagana binan suleigale. ¹⁷Ceteteh cunug age odoginaca je madeginaca eu Jisas Tibud

ijanna odoigale. Age odi odoig age Jisas umna Anut ege Memige hegaga doigale.

Pol uqa Kristen talnu maden

¹⁸Aidagail, age Tibudna je toodu odoginawe eu odi age gemugailna je toodu odoigale. ¹⁹Dana, age aidagailnu nalunuga meigale, odocob age cabi cajawe cain waadowain.

²⁰Mel sim, age anagail memegailca jejenega cunug gaid toodu odoigale. Ge, age odi odogina eu Anut gale dona. ²¹Memegail, age dumanaga culiaunnu agena mel mel aidca cain gagaladowain.

Pol uqa cabi dana bega meh cofadecanu maden

²²Begabeg meh cabi dana, age agena cofadec mahana bilegina agena je cunug toodu odoigale. Age cofaadebil qauaadi age amagana cabi me ogina eu age cabi me ogina ec madecnu odi cain odowain. Euqa age Tibudnu cucuieeig age wawaga osolna jejenega toodu odoigale. ²³Age cel cabi ogina eu odocnu megameg meigale. Age dananu cabi oginawe cain odowain qa Tibudnu cabi oginawe odi odoiga. ²⁴Age dogina, Tibud uqa mugumuga mec uqana dana cajacanu hewena eu adigian. Age Kraiss Tibud cewel utogina. ²⁵Odocob dana cahuldoc odona eu Anut uqa uqana cahuldocnu ameg me qee wadacdigian. Ge, Anut uqa begabeg meh cabi danaca cofadec danaca gug osolna dih ihocihoc gesiladena.

4 ¹Cofadec, agena cofadec eu saona gun bilina ec dogina. Eunu age agena begabeg meh cabi dana kobol me tutucna odadeigale.

Ege gagadicca inondudu jic tutuc coboqale

²Age inondocnu kobol gagadicca heweigale. Agena inondocna age cisdu cuhadumeig Anut hegaga doigale. ³Saen euna dih age egenuha inondoiga, Anut uqa ege jic qahigeceb uqana je dana cajaca maadecnu. Eunu ege Kraissna je jahunec sildiadi madeqan. Ge, ija Anutna je qasali maadem eunu gihacdoc jona biligina. ⁴Ija je jahunec eu sildiadi madecemin camasac miyannu inondoigale, odocob ija me je qasali maadigen eu odi Anut gale dona.

⁵Dana cajaca age wawaga qee meleec bilegina eu age gemona agena cobocnu cisdu cuhadoiga. Age saen cunugna Kraissna coboc ihacadecnu saciadu bileigale. ⁶Agena je eu gaid me bahic tinca madeigale. Odocob age dana cajaca cunug agena sisilec tutuc wadacduadoqagannu ihoc biloub.

Pol uqa Tikikas Onisimasca sulaleceb Kolosi ono belesin

⁷Tikikas ege wawige meleec cotige bahic, uqa Tibudna cabi dana me bahic, uqa ege cabi hijige, uqa ijana je cunug saadigian. ⁸Ija gug eunu

ege adi biluqunanu doqagannuca, odocob uqa age wawaga gagadic mudiadigiannuca, uqa sulduadigina. ⁹Odocob ija Onisimas^a Tikikasca osoben sulaligina. Onisimas uqa agena wawaga meleec cotoga me bahic, uqa agena cotogail amdec. Ale ceteh cunug ene calen eunu maadowasan.

¹⁰Aristakas uqa ijaca gihacdoc jona biluwuna uqa feele adec sulduadena. Odocob Mak, uqa Banabas gainag, uqaha feele adec sulduadena. (Ija Maknu je wele sulduadem, uqa ageca calecebfi age ehudeiga ec maadem.) ¹¹Josua age Jastas egina uqaha feele adec sulduadena. Ijana Anutna cul cabi hijel gemonadec dana cijed i age feele adec sulduadegina age himec Judadec. Odocob age ija geh bahic cesultein.

¹²Epafras uqaha age cabi cotoga oso, uqa Kraiss Jisasna cabi dana, uqa feele adec sulduadena. Uqa gaid Anut age cesuladecnu uqana inondocna cabi gagadic ona. Uqa Anut cesuladeceb age wawaga meleec dana bahic tawoqagannu, odocob age Anutna gale doc cunug du cuhadoqagannu inondona. ¹³Ija uqanu je i mele maadigina. Uqa ageca, wawaga meleec dana cajaca age Leodisia Hirapolisca ono bileginaca cesuladigiannu cabi gagadic bahic ona. ¹⁴Luk^b egena dokta uqanu nalug moqona, uqa Dimasca ale alena feele adec sulduadesina.

¹⁵Age ijana feele adec cotigeil age Leodisia ono bilegina eu ageha adeigale. Odocob age Nimpaca tamanec uqana jona cegulegina euca ijana feele adec adeigale. ¹⁶Odocob age jaqiadec i saniji hedumeig age suldocobil Leodisia tamanecna leia, age Kolosiha eu saniji doqagannu. Odocob jaqiadec ija Leodisia tamanec sulduadem eu ageha sanijuqagan. ¹⁷Odocob age Akipas odi madoigale, “Cabi i hina Tibudnadec om eu odi me bahic odogale,” ec doigale.

¹⁸Ija Pol, ijadodoc ebenina feele adec i jaqiadigina.^c Age ija gihacdoc jona gaid biligina eunu ijanu cisdoigale. Anutna eelgec uum igec eu ageca biliale.

^a (4.9) Onisimas uqa Failimonna bega meh cabi dana. Age Pol uqa Failimon je jaqiton eu feiga. ^b (4.14) Dana mati age Luk i uqa Lukna Me Jeca, Aposel Agena Cabi Occa jaqalen ec cisdogina. ^c (4.18) Age je 1 Korin 16.21na nijia eu feiga.